

四庫全書

史部

欽定四庫全書

史部

明史卷二百六十二

給事中_臣劉湄覆勘

總校官編修_臣朱鈴

欽定四庫全書

明史卷二百六十二

大學士張廷玉等奉 敕修

列傳第一百五十五

傳宗龍

汪喬年

張國欽等

楊文岳

孫傳庭

傳宗龍字仲綸昆明人萬曆三十八年進士除銅梁知

縣調巴縣行取入為戶部主事久之授御史天啟元年

遼陽破帝下募兵之令宗龍請行一月餘得精卒五千
明年安邦彥反圍貴陽土寇蜂起請發帑金濟滇將士
開建昌通由蜀入滇之路別設偏沅巡撫罷湖廣退怯
總兵薛來允帝多採納之又上疏自請討賊言為武定
尋甸患者東川土酋祿千鍾為寇益羅平患者賊婦設
科及其黨李賢輩攻圍普安為滇黔門戶患者龍文治
妻及其黨尹二困安南據關索嶺者沙國珍及羅應魁
輩困烏撒者安效良臣皆悉其生平非臣敵臣願以四

川巡按兼貴州監軍滅此羣醜帝大喜下所司議會宗龍以疾歸不果行四年正月貴州巡撫王三善為降賊陳其愚所紿敗歿其夏即家起宗龍巡按其地兼監軍初部檄滇撫閔洪學援黔以不能過盤江而止宗龍既被命洪學令參政謝存仁參將袁喜及土官普名聲沙如玉等以兵五千送之宗龍直渡盤江戰且行寇悉破乃謝遣存仁善以名聲等土兵七百人入貴陽禽斬其愚軍民大快宗龍盡知黔中要害及土酋逆順將士勇

怯巡撫蔡復一倚信之請敕宗龍專理軍務設中軍旗
鼓裨將以下聽賞罰可之宗龍乃條上方略又備陳黠
中艱苦請大發餉金亦報可初三善命監軍道臣節制
諸將文武不和進退牽制宗龍反其所為令監軍給芻
糧覈功罪不得專進止由是諸將用命連破賊汪家冲
蔣義寨直抵織金五年正月總理魯欽敗績於陸廣河
宗龍上言不合滇蜀則黠不能平賊不專總督任則不
能合滇蜀兵請召還朱燮元以復一兼督四川開府遵

義而移蜀撫駐永寧滇撫駐霑益黔撫駐陸廣元撫駐
偏橋四面竝進發餉二百萬金給之更設黔蜀巡撫帝
以復一新敗令解官即以變元代而命尹同臯撫蜀王
瑊撫黔沅撫閔夢得移鎮一如宗龍議陸廣敗後諸苗
復蠢動復一宗龍謀討破烏粟螺蛳長田諸叛苗大破
平越賊毀其砦百七十賊黨漸孤宗龍乃條上屯守策
言蜀以屯為守黔則當以守為屯益安酋土地半在水
外犵狁龍仲蔡苗諸雜種緩急與相助賊有外蕃我無

邊蔽黔兵所以分力愈詘臣謂以守為屯者先發兵據河奪賊所恃然後撫勦諸種隨渡口大小置大小塞深溝高壘置烽墩礮臺小渡則塞以木石使一粟不入水內一賊不出水外賊無如我何又令沿河兵習水戰當賊耕耨時頻出奇兵渡河擾之賊不敢附河而居而後我可以議屯也屯之策有二一曰清衛所原田一曰割逆賊故壤而以衛所之法行之蓋黔不患無田患無人客兵聚散無常不能久駐莫若倣祖制盡舉屯田以授

有功因功大小為官高下自指揮至總小旗畀以應得
田為世業而禁其私賣買不待招徠戶口自實臣所謂
以守為屯者如此然兵當用四萬八千人餉當歲八十
餘萬時當閱三年如此而後賊可盡滅也部議從之復
一卒王瑊代事悉倚辦宗龍乃漸剪水外逆黨將大興
屯田邦彥懼謀沮之六年三月大舉渡河入寇宗龍擊
破邦彥趙官屯斬老蟲添威名大著當是時大帥新亡
全黔震動變元遠在蜀瑊擁虛位非宗龍黔幾殆詔加

太僕少卿憂歸崇禎三年起故官用孫承宗薦擢右僉都御史巡撫順天未幾拜兵部右侍郎兼僉都御史總督薊遼保定軍務用小故奪官矣居久之十年十月流寇大入蜀陷蜀三十餘州縣帝附驥而思宗龍曰使宗龍撫蜀賊安至是哉趣即家起宗龍宗龍至蜀代王維章與總兵羅尚文禦却賊十二年五月以楊嗣昌薦召為兵部尚書去蜀宗龍自定黔亂後凡十有四年輒起用用不久輒遷去八月至京入見帝宗龍為人伉直任

氣不能從諛承意帝憤中樞失職嗣昌以權詭得主知
宗龍樸忠初入見即言民窮財盡帝頗然之顧狼狽言
不已遂怫然曰卿當整理兵事爾既退語嗣昌曰何哉
宗龍善策點而所言卑卑皆他人唾餘何也自是所奏
請多中格熊文燦既罷宗龍乃言向者賊流突東西嗣
昌故建分勦之策今則流突者各止其所臣請收勢險
節短之效總理止轄楚豫秦督兼轄四川鳳督兼轄安
慶各率所轄撫鎮期十二月成功因薦湖廣巡撫方孔

昭堪代文燦帝不用用嗣昌督師嗣昌既督師上章請
兵食不悉應劾中樞不任宗龍亦劾嗣昌徒耗散國家
不能報効以氣凌廷臣會薊遼總督洪承疇請用劉肇
基為團練總兵官中官高起潛又揭肇基恇怯宗龍不
即覆帝遂發怒責以抗旨令對狀奏上復以戲視封疆
下吏法司擬戍邊不許欲寘之死在獄二年矣十四年
春嗣昌死尚書陳新甲薦其才帝未有以應也良久曰
樸忠吾以夙負用之宜盡死力遂釋之出獄以兵部右

侍郎兼右僉都御史代丁啟睿總督陝西三邊軍務當
是之時李自成有衆五十萬自陷河洛犯開封羅汝才
復自南陽趨鄧淅與合兵帝命宗龍專辦自成議盡括
關中兵餉以出然屬郡旱蝗已不能應九月四日以川
陝兵二萬出關次新蔡與保督楊文岳兵會賀人龍李
國奇將秦兵虎大威將保兵共結浮橋東渡汝合兵趨
項城五日兩軍畢渡走龍口自成汝才亦結浮橋于上
流將趨汝寧覘兩督兵至盡伏精銳于林中陽驅諸賊

自浮橋西渡人龍使後騎覘賊還報曰賊向汝矣結浮橋將渡矣宗龍文岳夜會諸將于龍口詰朝將戰六日兩軍並進中道一騎馳而告曰賊畢渡矣復進一騎馳而告曰賊半渡矣三分渡其二矣宗龍文岳曰馳之走三十里至于孟家莊曰卓午人龍大威曰馬力乏矣詰朝而戰止兵為營諸軍弛馬甲植戈鋌散行壩落求芻牧賊覘之塵起于林中伏甲並出搏我兵人龍有馬千騎不戰國奇以麾下兵迎擊之不勝秦兵保兵俱潰人

龍大威奔沈邱國竒從之三帥師潰宗龍文岳合兵屯
火燒店賊以步兵攻其營諸軍鳴大礮震死賊百餘日
暮賊引去宗龍軍西北文岳軍東南畫壘而守保兵宵
潰保督副將挾文岳騎而馳夜奔于項城宗龍復分秦
兵立營于東南諸將分壁當賊壘九日檄人龍國竒還
兵救二帥不應宗龍曰彼避死宜不來吾豈避死哉語
其麾下曰宗龍老矣今日陷賊中當與諸軍決一死戰
不能效他人捲甲走也召裨校李本實即文岳壁穿塹

築壘以拒賊賊亦穿壕二重以圍之十一日秦師食盡宗龍殺馬騾以享軍明日營中馬騾盡殺賊取其屍分噉之十八日營中火藥鉛子矢並盡宗龍簡士卒夷傷死喪之餘有衆六千夜半潛勒諸軍突賊營殺千餘人潰圍出諸軍星散宗龍徒步率諸軍且戰且走十九日卓午未至項城八里賊追及之執宗龍呼于門曰秦督圍隨官丁也請啟門納秦督宗龍大呼曰我秦督也不幸墮賊手左右皆賊耳賊唾宗龍宗龍罵賊曰我大

臣也殺則殺耳豈能為賊賺城以緩死哉賊抽刀擊宗龍中其腦而仆斲其耳鼻死城下事聞帝曰若此可謂樸忠矣復官兵部尚書加太子少保謚忠壯廕子錦衣世百戶子祭葬人龍國奇兵潰歸陝賊遂屠項城分兵屠商水扶溝遂攻葉縣

汪喬年字歲星遂安人天啟二年進士授刑部主事歷郎中母憂歸崇禎二年起工部遷青州知府以治行卓異遷登萊兵備副使乞終養歸父喪除起官平陽遷陝

西右參政提督學校再以卓異就遷按察使喬年清苦自勵惡衣菲食之官攜二僕不以家自隨為青州行廊置土銼十餘訟者自炊候鞠吏無敢索一錢自負才武休沐輒馳騎習弓刀擊刺寢處風露中十四年擢右僉都御史巡撫陝西時李自成已破河南聲言入關喬年疾馳至商洛不見賊賊圍開封而三邊總督傅宗龍亦至陝議抽兵括餉則關中兵食已盡無以應宗龍喬年握手歔歔而別未幾宗龍敗歿于項城喬年流涕歎曰

傳公死討賊無人矣已又聞詔擢喬年兵部右侍郎總督三邊軍務代宗龍部檄踵至趣出關是時關中精銳盡沒於項城喬年曰兵疲餉乏當方張之寇我出如以肉餒虎耳然不可不一出以持中原心乃收散亡調邊卒得馬步三萬人十五年正月率總兵賀人龍鄭嘉棟牛成虎出潼關先是臨潁為賊守左良玉破而屠之盡獲賊所據自成聞之怒舍開封而攻良玉良玉退保鄆城賊圍之急喬年諸將議曰鄆城危在旦夕吾趨鄆賊

方銳難與爭鋒吾聞襄城距郛四舍賊老砦咸在吾舍
郛而以精銳攻其必應賊必還兵救則郛城解矣郛城
解我擊其前良玉乘其背賊可大破也諸將皆曰善乃
留步兵火器于洛陽簡精騎萬人兼程進次郛縣襄城
人張永祺等迎喬年二月二日喬年入襄城分人龍嘉
棟成虎軍三路駐城東四十里逼郛城而軍而自勒兵
駐城外賊果解郛城而救襄城賊至三帥奔良玉救不
至軍大潰喬年歎曰此吾死所也率步卒千餘入城守

賊穴地實火藥攻城喬年亦穿阱視所鑿長矛刺之賊
礮擊喬年坐燾雉堞盡碎左右環泣請避之喬年怒以
足蹴其首曰汝畏死我不畏死也二十七日城陷巷戰
殺三賊自剄不殊為賊所執大罵賊割其舌磔殺之襄
城人建祠而祀之時張國欽張一貫黨威李萬慶及監
紀西安同知孫兆祿材官李可從襄城知縣曹思正從
喬年皆死之萬慶者降將射塌天也又有馬帥某者逸
其名兆祿鹽山人可從藍屋人黨威神木人餘莫考黨

威則嘗擊賊于西維峪禽賊首竇阿婆者也自成購永
祺不得屠其族剽刖諸生劉漢臣等百九十人自成數
月之間再敗秦師獲馬二萬降秦兵又數萬勢震河雒
初喬年之撫陝西也奉詔發自成先塚米脂令邊大受
河間任邱舉人健令也詞得其族人為縣吏者掠之言
去縣二百里曰李氏村亂山中十六冢環而葬中其始
祖也相傳穴仙人所定壙中鐵燈繁鐵燈不滅李氏興
如其言發之螻蟻數石火光熒熒然斲棺骨青黑被體

黃毛腦後穴大如錢赤蛇盤三四寸角而飛高丈許昨
昨吞日光者六七反而伏喬年函其顱骨腊蛇以聞焚
其餘雜以穢棄之自成聞之嚙齒大恨曰吾必致死于
喬年既殺喬年由西華攻陳州

楊文岳字斗望南充人萬歷四十七年進士授行人天
啟五年擢兵科給事中屢遷禮科都給事中崇禎二年
出為江西右參政歷湖廣廣西按察使雲南山西左右
布政使以右副都御史巡撫登萊十二年擢兵部右侍

卽總督保定山東河北軍務代孫傳庭十四年正月李
自成陷洛陽犯開封文岳率總兵虎大威以衆二萬赴
救渡河賊先遁追擊于鳴舉還駐兵開封疫作乃頓兵
于汝寧出屯西平新蔡間七月自成走內鄉浙川與羅
汝才合文岳趨鄧州自成還攻之文岳戰三捷斬其魁
一條龍一隻龍賊遁去九月會陝西總督傅宗龍于新
蔡與賊遇大潰于孟家莊再潰于火燒店部將挾文岳
夜入于項城明日奔陳州宗龍遂覆沒事聞文岳革職

充為事官戴罪自贖乃收集散亡率所部就巡撫高名
衡防杞賊遂破萊縣拔泌陽乘勝陷南陽殺唐王下鄧
州等十四城再圍開封明年正月文岳馳救開封論功
復官臨潁為賊守左良玉破而屠之退保鄆城自成圍
鄆城二月督師丁啟睿及文岳大威救鄆城賊潰距官
軍數里而營文岳啓睿相犄角持十一晝夜總督汪喬
年出關賊引去再攻開封六月詔起侯恂兵部右侍郎
總督保定山東河南湖北軍務代文岳命所司察文岳

罪狀七月朔文岳啓睿合良王大威及楊德政方國安
四總兵之師次朱仙鎮諸軍盡潰啟睿文岳奔汝寧賊
渡河追奔四百里官軍失亡數萬詔禠官候勘九月文
岳在汝寧夜襲賊營有功賊既灌開封旋敗孫傳庭兵
以閏十一月悉衆薄汝寧老猢猻革裏眼左金王等畢
會文岳遣都司康世德以輕騎偵賊世德走還汝將其
步騎五百夜縱火噪而奔十三日羣賊並至壓汝寧五
里而軍監軍僉事孔貞會以川兵屯城東文岳以保兵

屯城西賊兵進攻相持一晝夜川兵潰殺傷數百賊奪其馬騾悉衆功保兵漸不支僉事王世琮知府傅汝為通判朱國寶總將士入城副將賈梯參將馮名聖亦掖文岳貞會登城明日賊四面環攻戴扉以陣矢石雲梯堵牆而立城頭矢礮擣石雨集賊死傷山積而攻不休一鼓百道並登執文岳及世琮國寶梯名聖于城頭殺汝陽知縣文師頤于城上汝為聞變赴水死賊擁文岳等見自成大罵賊怒縛之城南三里舖以大礮擊之洞

胷靡骨而死士民屠戮數萬焚公私廨舍殆盡貞會執去不知所終自成以文岳死忠備禮歛之遂拔營走確山信陽泌陽嚮襄陽虜崇王由櫝崇世子諸王妃及河南懷安諸王以行汝為字于宣江陵人崇禎七年進士世琮字仲發達州人國寶成都人師頤全州人皆舉人世琮嘗為汝寧推官討土寇流矢貫耳不為動時號王鐵耳者也師頤涖任甫三日

孫傳庭字伯雅代州振武衛人自父以上四世舉于鄉

傳庭儀表碩碩沈毅多籌略萬厯四十七年成進士授永城知縣以才調商邱天啓初擢吏部驗封主事屢遷稽勲郎中請告歸家居久不出崇禎八年秋始起驗封郎中超遷順天府丞陝西巡撫甘學濶不能討賊秦之士大夫譁于朝乃推邇才用傳庭以九年三月受代傳庭泣秦嚴徵發期會一從軍興法秦人愛之不如總督洪承疇然其才自足辦賊賊首整齊王据商雒諸將不敢攻檄副將羅尚文擊斬之當是時賊亂關中有名字

者以十數高迎祥最強拓養坤黨最衆所謂闖王蝎子塊者也傳庭設方略親擊迎祥于盤屋之黑水峪禽之及其偽領哨黃龍總管劉哲獻俘闕下錄功增秩一等而賊黨自是乃共推李自成爲闖王矣明年養坤及其黨張耀文來降已而養坤叛去諭其下追斬之擊賊惠登相於涇陽三原登相西走河南賊馬進忠劉國能等十七部入渭南追之出關復合河南兵夾擊之先後斬首千餘級進忠等復擾商雒藍田叛卒與之合將犯西

安遣左光先曹變蛟追走之渭南降其渠一條龍招還脅從募健兒擊餘賊斬聖世王瓦背一翅飛降鎮天王上山虎又殲白捍賊渠魁數人關南稍靖遣副將盛畧等敗賊大天王于寶雞賊走入山谷傳庭追之鳳翔他賊出棧道謀越關犯河南還軍擊賊走伏斜谷復大敗之降其餘衆西安四衛舊有屯軍二萬四千田二萬餘頃其後田歸豪右軍盡虛籍傳庭釐得軍萬一千有奇歲收屯課銀十四萬五千餘兩米麥萬三千五百餘石

帝大喜增秩賚銀幣會楊嗣昌入為本兵條上方畧洪承疇以秦督兼勦務而用廣撫熊文燦為總督分四正六隅馬三步七計兵十二萬加派至二百八十萬期百日平賊傳庭移書爭之曰無益且非特此也部卒屢經潰蹶民力竭矣恐不堪命必欲行之賊不必盡而害中于國家累數千言嗣昌大忤部議秦撫當一正面募土著萬人給餉銀二十三萬以商雒等處為汛守傳庭知其不可用也乃挾帑藏蠲贖醵得銀四萬八千市馬募

兵自辦滅賊具不用部議會諸撫報募兵及額傳庭疏獨不至嗣昌言軍法不行于秦自請白衣領職以激帝怒傳庭奏曰使臣如他撫籍郡縣民兵上之遂謂及額則臣先所報屯兵已及額矣况更有募練馬步軍數且踰萬何嘗不遵部議至百日之期商維之汎守臣皆不敢委然使賊入商維而臣不能禦則治臣罪若臣扼商維而踰期不能滅賊誤勦事者必非臣嗣昌無以難然銜之彌甚傳庭兩奉詔進秩當加部銜嗣昌抑弗奏十

一年春賊破漢陰石泉則坐傳庭失援削其所加秩傳庭出扼商雒大天王等犯慶陽寶雞還軍戰合水破走之獲其二子追擊之延安過天星混天星等從徽秦趨鳳翔逼澄城傳庭分兵五道擊之楊家領黃龍山大破之斬首二千餘級大天王知二子不殺遂降賊引而北犯延安傳庭策鄜州西合水東三四百里荒山邃谷賊入當自斃乃率標兵中部遏其東檄變蛟慶陽拒其西伏兵三水淳化間賊飢出掠食則大張旗幟鳴鼓角以

邀之一日夜馳二百五十里賊大驚西奔至職田莊遇
伏而敗復走寶鷄取棧道再中伏大敗折而走隴州關
山道又為伏兵所挫三敗賊死者無算過天星混天星
竝降又逐賊邠寧間陷陣護其渠河南賊馬盡忠馬光
玉驅宛洛之衆箕張而西傳庭擊之賊還走又設伏於
潼關原變蛟逐賊入伏而闖王李自成者為洪承疇所
逐盡亡其卒以十八騎潰圍遁關中羣盜悉平是為崇
禎之十一年冬也捷聞大喜先叙澄城之捷命加傳庭

部銜嗣昌仍格不奏當是時總理熊文燦主撫湖廣賊張獻忠已降惟河南賊如故羅汝才馬進忠賀一龍左金王等十三部西窺潼關聯營數十里傳庭計曰天下大寇盡在此矣我出擊其西總理擊其東賊不降則滅此賊乎天下無賊矣獻忠即狙伏無能為也乃遂引兵東大敗賊閔鄉靈寶山間貫其營而東復自東以西賊窘甚以文燦招降手諭上言旦夕且降傳庭曰爾曹曰就熊公言撫而曰攻堡屠寨不已是偽也降即解甲來

有說即非真降吾明日進兵矣明日擐甲而出得文燦檄於途中曰毋妬吾撫功又進得本兵嗣昌手書亦云傳庭怏怏撤兵還然賊迄不就撫移瞰高雒文燦悔期傳庭夾擊屬吏王文清等三戰三敗之賊奔內鄉浙川而去傳庭既屢建大功其將校數奉旨優叙嗣昌務抑之不為奏傳庭懇請上其籍於部嗣昌曰需之十月京師戒嚴召傳庭及承疇入衛擢兵部右侍郎兼右僉都御史代總督盧象昇督諸鎮援軍賜劍當是時傳庭提

兵抵近郊與嗣昌不協又與中官高起潛忤降旨切責不得朝京師承疇至郊勞且命陛見傳庭不能無觖望無何嗣昌用承疇以為薊督欲盡留秦兵之入援者守薊遼傳庭曰秦軍不可留也留則賊勢張無益於邊是代賊徹兵也秦軍妻子俱在秦兵曰殺賊以為利久留於邊非譁則逃不復為吾用必為賊用是驅民使從賊也安危之機不可不察也嗣昌不聽傳庭爭之不能得不勝鬱鬱耳遂罄傳庭初受命疏言年來疆事決裂由

計畫差謬事竣當面請決大計明年帝移傳庭總督保
定山東河南軍務既解嚴疏請陞見嗣昌大驚謂傳庭
將傾之斥來役賫疏還之傳庭傳庭愠引疾乞休嗣昌
又劾其托疾非真聾帝遂發怒斥為民下巡撫楊一儁
覈真偽一儁奏言真聾非托疾并下一儁獄傳庭長繫
待決舉朝知其冤莫為言在獄三年文燦嗣昌相繼敗
而是時闖王李自成者已攻破河南矣犯開封執宗龍
殺唐王兵散而賊益橫帝思傳庭言朝士薦者益衆十

五年正月起傳庭兵部右侍郎親御文華殿問勦賊安
民之策傳庭侃侃言帝嗟歎久之燕勞賞賚甚渥命將
禁旅援開封開封圍已解賊殺陝督汪喬年帝即命傳
庭往代大集諸將於關中縛援勦總兵賀人龍坐之麾
下數而斬之謂其開縣噪歸猛帥以孤軍失利而獻曹
出柙也又謂其遇敵先潰新蔡襄城連喪二督也諸將
莫不洒然動色者傳庭既以誅殺人龍威讐三邊日夜
治軍為平賊計而賊遂已再圍開封詔御史蘇京監延

寧甘固軍趣傳庭出關傳庭上言兵新募不堪用帝不聽傳庭不得已出師以九月抵潼關大雨連旬自成決馬家口河灌開封開封已陷傳庭趨南陽自成西行逆秦師傳庭設三覆以待賊牛成虎將前軍左勦將左鄭嘉棟將右高傑將中軍成虎陽北以誘賊賊奔入伏中成虎還兵而鬪高傑董學禮突起翼之左勦鄭嘉棟左右橫擊之賊潰東走斬首千餘追三十里及之邾縣之塚頭賊棄甲伏軍資於道秦兵趨利賊覘我軍囂反兵

乘之左勦蕭慎鼎之師潰諸軍皆潰副將孫枝秀躍馬以追賊擊殺數十騎賊兵圍之馳突不得出馬蹶被執植立不撓以刃臨之瞠目不答一人曰此孫副將也遂殺之參將黑尚仁亦被執不屈而見殺覆軍數千材官小將之歿者張暎奎李棲鳳任光裕戴友仁以下七十有八人賊倍獲其所喪馬傳庭走輩由益入關執斬慎鼎罰勦馬以二千以勦父光先故貸勦是役也天大雨糧不至士卒採青柿以食凍且餒故大敗豫人所謂柿

園之役也傳庭既已敗歸陝西計守潼關扼京師上游
且我軍新集不利速戰乃益募勇士開屯田繕器械積粟
三家出壯丁一火車載大礮甲仗者三萬輛戰則驅之
拒馬止則環以自衛督工苛急夜以繼日秦民不能堪
而關中頻歲饑駐大軍餉乏士大夫厭苦傳庭所為用
法嚴不樂其在秦相與譁於朝曰秦督翫寇矣又相與
危語恟脇之曰秦督不出關收者至矣明年五月命兼
督河南四川軍務尋進兵部尚書改稱督師加督山西

湖廣貴川及江南北軍務賜劍趣戰益急傳庭頓足歎
曰柰何乎吾固知往而不返也然大丈夫豈能再對獄
吏乎頃之不得已遂再議出師總兵牛成虎將前鋒高
傑將中軍王定官撫民將延寧兵為後勁白廣恩統火
車營檄左良玉赴汝寧夾擊當是時自成已據有河南
湖北十餘郡自號新順王設官置戍營襄陽而居之將
由內浙窺商雒盡發荆襄兵會於汜水滎澤伐竹結筏
人佩三葫蘆將謀渡河傳庭分兵防禦八月十日傳庭

出師潼關次於閿鄉二十一日師次陝州檄河南諸軍
渡河進勦九月八日師次汝州偽都尉四天王李養純
降養純言賊虛實諸賊老營在唐縣偽將吏屯寶豐自
成精銳盡聚於襄城遂破賊寶豐斬偽州牧陳可新等
遂擣唐縣破之殺家口殆盡賊滿營哭轉戰至邾縣遂
禽偽果毅將軍謝君友斫賊坐纛尾自成幾獲賊奔襄
城大軍遂進逼襄城賊懼謀降自成曰無畏我殺王焚
陵罪大矣姑決一死戰不勝則殺我而降未晚也而大

軍時皆露宿與賊持久雨道漕糧車不能前士饑攻邦破之獲馬羸噉之立盡兩七日夜不止後軍譁於汝州賊大至流言四起不得已還軍迎糧留陳永福為後拒前軍既移後軍亂永福斬之不能止賊追及之南陽官軍還戰賊陣五重饑民處外次步卒次馬軍又次驍騎老營家口處內戰破其三重賊驍騎殊死鬪官軍陣稍動廣思軍將火車者呼曰師敗矣脫輓輅而奔車傾塞道馬絀於衡不得前賊之鐵騎凌而騰之步賊手白楮

遮擊中者首兜鍪俱碎自成空壁躡我一日夜官兵狂奔四百里至於孟津死者四萬餘失亡兵器輜重數十萬傳庭單騎渡垣曲由閩鄉濟賊獲督師生纛乘勝破潼關大敗官軍傳庭與監軍副使喬遷高躍馬大呼而歿於陣廣恩降賊傳庭屍竟不可得傳庭死關以內無堅城矣初傳庭之出師也自分必死顧語繼妻張夫人曰爾若何夫人曰丈夫報國耳毋憂我及西安破張率二女三妾沉於井揮其八歲兒世寧亟避賊去之兒踰

牆墮民舍中一老翁收養之長子世瑞聞之重趼入秦
得夫人屍井中面如生翁歸其弟世寧相扶携還道路
見者知與不知皆泣下傳庭死時年五十有一矣傳庭
再出師皆以雨敗也或言傳庭未死者帝疑之故不予
贈廕傳庭死而明亡矣

贊曰流賊蔓延中原所恃以禦賊者獨秦兵耳宗龍喬
年文岳皆能奮力以當賊鋒而終於潰債此殆有天焉
非其才之不任也若傳庭竭忠盡瘁才更出諸人上乃

為楊嗣昌所沮即偏裨勞績亦多格不上聞忌功掣肘
其誤國甚矣況加以詔書之趣戰遂致南陽一敗賊勢愈
張明季之亡實決于此又豈得盡諉之天意哉

明史卷二百六十二

欽定四庫全書

明史卷二百六十二考證

傅宗龍傳貴州巡撫王三善為陳其愚詐降所紿敗歿

臣嚴福按毛奇齡蠻司合志安邦彥圍貴州朝命

以王三善代李璽為巡撫三善忠勇屢戰敗衆斬獲
無算而總督楊述中主撫與三善不合會安邦彥遣
陳其愚詐降三善謂楊督既立撫局勢難自異因受
降卒為其愚所害謹附考

傳宗龍傳用小故奪官矣 臣嚴福按明實錄宗龍為

總督以崇禎七年兵科給事中常自劾其赴援逗

遛奪官歸謹附考

汪喬年傳米脂令邊大受 臣嚴福按任邱縣志受作

綬與此異

本朝仕至太原知府謹附考

孫傳庭傳縛援勦總兵賀人龍坐之麾下數而斬之

臣嚴福按明通鑑紀事傳宗龍汪喬年之歿帝深怒

人龍而人龍米脂人親族多在賊中欲誅之而未可
輕發及傳庭出帝授以意佯貫其死執斬之謹附考

孫傳庭傳傳庭出師潼關

臣嚴福按綏寇紀略傳庭

出潼關賊有說之者曰公不奉駐洛陽之旨乎洛城
故址未毀修築半月可畢流離之民聞洛陽復定不
召自集公於此儲糗糧開屯田進戰退守經略中原
此祖述之鎮雍邱宗澤之復東京也不聽謹附考

明史卷二百六十二考證

附明史卷二百六十二考證後

乾隆四十一年

賜諡諸臣

孫傳庭 專諡忠靖

汪喬年 黨威 楊文岳 王世琮

以上通諡忠烈

張國欽 張一貫 孫兆祿 賈悌 馮名聖

孫枝秀 黑尚仁 喬遷高

以上通謚烈愍

曹思正 傅汝為 朱國寶 文師頤 任光裕

以上通謚節愍

欽定四庫全書

明史卷二百六十三

大學士張廷玉等奉 敕修

列傳第一百五十一

宋一鶴

沈壽崇

蕭

漢

馮師孔

黃

綱等

林日瑞

郭天吉等

蔡懋德

趙建樞等

衛景瑗

朱家仕等

朱之馮

朱敏泰等

陳士奇

陳

繼等

龍文光

劉佳引

劉之勃 劉鎮藩

宋一鶴宛平人為諸生見天下大亂即究心兵事崇禎三年舉於鄉授教諭以薦遷邱縣知縣復以薦加東昌同知仍知縣事巡按御史禹好善以一鶴知兵薦之授兵部員外郎尋擢天津兵備僉事改飭汝南兵備駐信陽時熊文燦總理南畿河南山西陝西湖廣四川軍務主撫議一鶴降其盜魁黃三耀又降其死賊順天王之黨劉喜才一鶴先後勦劇賊斬首七百有奇從副將龍

在田破賊固始一鶴毒殺其賊千人左良玉降其賊李
萬慶一鶴撫而定之數萬文燦屢上其功薦之進副使
調鄖陽文燦誅楊嗣昌代以一鶴能薦之擢右僉都御
史代方孔炤巡撫湖廣時湖廣賊為諸將所逼多竄入
四川一鶴以雲南軍移鎮當陽中官劉元斌以京軍移
鎮京門相犄角左良玉等大破賊於瑪瑙山一鶴叙功
增俸遣副將王允成孫應元等大破賊汝才五大營於
豐邑坪斬首三千餘級嗣昌署一鶴荆楚第一功獻忠

陷襄陽與革裏眼左金王等東萃黃州汝寧間一鶴移
駐蘄州焚舟遏賊渡賊移而北一鶴又斷橫江賊不敢
渡嗣昌卒丁啟睿代啟睿破獻忠於麻城會一鶴及鳳
陽總督朱大典安慶巡撫鄭二陽薨賊左金王老回回
等於潛山懷寧山中一鶴又督叅將王嘉謨等追破左
金王爭世王治世王於燈草坪斬首千八百級十五年
遣部將陳治等合江北兵破賊於桐城舒城一鶴起鄉
舉不十年秉節鉞廷臣不能無忤御史衛周允上疏醜

詆一鶴一鶴屢建功然亦往往蒙時詒嗣昌父名鶴一
鶴投揭自署其名曰一鳥楚人傳笑之一鶴亦連疏引
疾帝疑其偽下所司嚴核先以襄陽陷奪職戴罪至是
許解官候代趨救汝寧汝寧城已陷十二月襄陽德安
荊州連告陷一鶴趨承天護獻陵陵軍柵木為城賊積
薪燒之烟冒純德山城穿一鼓而登犯獻陵毀裡殿守
陵巡按御史李振聲總兵官錢中選皆降歲除攻承天
明年正月二日有以城下賊者城遂陷一鶴自經故留

守沈崇壽鍾祥知縣蕭漢俱死分巡副使張鳳翥走入
山中先是左良玉軍擾襄樊一鶴疏糾之既良玉自襄
走承天軍饑而掠乞餉於一鶴不許良玉銜之至是一
鶴謀留良玉兵良玉走武昌故及於難壽崇宣城人都
督有容子崇禎初武進士忤巡按被劾罷未行而賊至
遂及於難贈都督僉事蔭子錦衣百戶漢字雲濤南豐
人崇禎十年進士秩滿將行賊薄城即辭家廟授悅於
妾媵曰男忠女烈努力自盡遂出登陴拒守五晝夜元

旦哭圍出趨獻陵賊騎環之漢大呼鍾祥今在誰敢驚
陵寢者賊挾之去不殺說降不聽明日城陷送漢吉祥
寺謹視之求死不得越三日從僧榻得剃刀藏之取敝
紙書楊繼盛絕命詞紙盡投筆起復拾土塊畫鍾祥縣
令蕭漢願死此寺十字於壁即對壁自剄血正濺字上
死矣賊嘉其義令錦衣斂而瘞之賊退其門人改斂之
以時服曰嗚呼大白其無黷乎吾師肯服賊服乎悉易
之詔贈漢大理寺丞振聲米脂人與自成同縣而同姓

自成呼之為兄後復殺之將發獻陵大聲起山谷若雷震虎咆哮乃止

馮師孔字景魯原武人萬曆四十四年進士授刑部主事歷員外郎郎中恤刑陝西釋疑獄百八十人天啟初出為真武知府遷井陘兵備副使憂歸崇禎二年起臨鞏兵備改固原再以憂歸服闋起懷來兵備副使移密雲忤鎮守中官鄧希詔希詔撫他事劾之下吏削籍歸十五年詔舉邊才用薦起故官監通州軍勤王兵集都

下剽刼公行割婦人首報功師孔大怒以其卒抵死明年舉天下賢能方面官鄭三俊薦師孔六月擢右僉都御史代蔡官治巡撫陝西調兵食趣總督孫傳庭出關當是之時賊十三家七十二營降師殆盡惟李自成張獻忠存自成尤強據襄陽以河洛荆襄四戰之地關中其故鄉士馬甲天下據之可以霸決策西向憚潼關天險將自析川龍車寨間道入陝西傳庭聞之令師孔率四川甘肅兵駐商維為犄角而師孔趣戰無何傳庭敗

績於南陽賊遂乘勝破潼關大隊長驅勢如破竹師孔
整衆守西安人或咎師孔趣師致敗也賊至守將王根
子開門入之十月十一日城陷師孔投井死同死者按
察使黃綱長安知縣吳從義秦府長史章尚綱指揮崔
爾達綱字季侯光州人天啟二年進士崇禎中以淮海
兵備副使憂歸流賊陷州城綱方廬墓山中子彝如死
於賊其妹亦被難服除起臨鞏兵備副使調番兵大敗
李自成潼關原尋以右叅政分守洮岷擢陝西按察使

自成勸之降叱曰潼關之役汝我戮餘也今日肯降汝
耶妻王赴井綱得間亦赴井皆死贈太常卿謚忠烈尚
綱會稽人聞城陷投印井中冠服趨王府端禮門雖經
贈按察司副使從義山陰人兒時夢一人拊其背曰歲
寒松柏其在斯乎崇禎十三年成進士之官兵荒從義
練丁壯三百人殺賊賊破秦從義曰嗟乎豈非天哉吾
唯昔夢是踐矣遂投井死贈按察司僉事爾達不知何
許人亦投井死之自是長安多義井賊遂執秦王存樞

處其宮署置百官稱王西安坐王府中日執士大夫拷掠索金錢分兵四出攻抄有小吏邱從周者長不及三尺乘醉罵自成曰若一小民無賴妄踞王府將僭偽號而所為暴虐若此何能久賊怒斫殺之而布政使平湖陸之祺及里居吏部郎乾州宋企郊提學僉事真寧翠靖皆降賊得寵用先是戶部尚書倪元璐奏曰天下諸藩孰與秦晉秦晉山險用武國也請諭二王以勸賊保秦責秦王以遏賊不入責晉王王能殺賊假王以大將

軍權不能殺賊宜悉輸王所有與其齎盜何不享軍封
王各一子如親王亦足以明報矣二王獨不鑒十一宗
之禍乎賢王忠而熟於計必知所處矣書上不報至是
賊果破秦悉為賊有焉

林日瑞字浴元詔安人萬歷四十四年進士崇禎初以
江西右叅政憂歸服闋起故官分守湖廣屬縣鉛山界
閩妖人聚山中謀不軌圍鉛山日瑞擊敗之搃其巢屢
遷陝西左右布政使十五年夏遷右僉都御史代呂大

器巡撫甘肅明年十一月李自成屠慶陽其別將賀錦
犯蘭州蘭州人開城迎賊賊遂渡河涼州莊浪二衛降
即進逼甘州日瑞聞賊急結西羌嚴兵以待而自率副
將郭天吉等扼諸河十二月賊踏冰過直抵甘州城
下日瑞入城戰且守大雪深丈餘樹盡介角幹折手足
數瘡守者咸怨賊承夜坎雪而登城陷執日瑞誘以官
不從磔於市初日瑞撫甘肅廷議以其不任也遣楊汝
經代之未至日瑞遂及於難天吉及總兵官馬嶺撫標

中軍哈維新姚世儒監紀同知藍臺里居總兵官羅俊傑趙官並死之賊殺居民四萬七千餘人三邊既陷列城望風降惟西寧衛固守不下賊無後顧乃長驅而東福王時贈日瑞兵部尚書臺太僕寺少卿皆賜祭葬

蔡懋德字維立崑山人少慕王守仁為人著管見宗良知之說舉萬曆四十七年進士授杭州推官天啟間行取入都同鄉顧秉謙柄國懋德不與通秉謙怒以故不得顯擢授禮部儀制主事進祠祭員外郎尚書率諸司

往謁魏忠賢祠懋德託疾不赴崇禎初出為江西提學副使好以守仁拔本塞源論教諸生大抵釋氏之緒論遷浙江右叅政分守嘉興湖州劇盜屠阿丑有衆千餘出沒太湖懋德曰此可計擒也悉召瀕湖豪家把其罪簡壯士與同發遂擒阿丑僉曰懋德知兵內艱服除起井陘兵備旱懋德禱即雨他鄉爭迎以禱又輒雨調寧遠以守松山及修臺堡功數叙賚會災異求言懋德上省過治平二疏規切君相一時咸笑為迂懋德好釋氏

律身如苦行頭陀楊嗣昌謂其清修弱質不宜處邊地
改濟南道濟南新殘破大吏多缺人懋德攝兩司及三
道印遷山東按察使河南右布政使田荒穀貴民苦催
科賊復以先服不輸租相煽誘懋德亟檄州縣停徵上
疏自劾詔鑄七級視事十四年冬擢右僉都御史巡撫
山西召對賜酒饌銀幣明年春抵任討平大盜王冕十
月統兵入衛京師詔扼守龍泉固關二關李自成已陷
河南懋德禦之河上十六年冬自成破潼關據西安盡

有三秦十二月懋德師次平陽遣副將陳尚智扼守河
津山西京師右臂蒲州北抵寶德悉隣賊依黃河為險
然窮冬冰合賊騎得長驅懋德連章告急請禁旅及保
定宣府大同兵疾赴河干合拒中朝益積憂山西言防
河者甚衆然無兵可援懋德以疲卒三千當百萬狂寇
時太原洵洵晉王手教趣懋德還省十八日懋德去平
陽二十日賊抵河津自船窩東渡尚智走還平陽二十
二日賊攻平陽拔之尚智奔入泥源山中二十八日懋

德還太原明年正月自成稱王於西安賊既渡河轉掠河東列城皆陷於是山西巡按御史汪宗友上言曰晉河二千里平陽居其半撫臣懋德不待春融冰泮遽爾平陽返旆賊即於明日報渡矣隨行馬步千人即時倍道西向召集陳尚智叛卒移檄各路防兵援勦乃不發一兵歲終至省臣言宜提一旅星馳而前張疑聲討尚冀桑榆之收無如不聽何賊日遣偽官匝月餘郡皆失是誰之過歟有詔奪官候勘以郭景昌代之二十三日

尚智叛降於賊於是懋德誓師於太原布政使趙建極
監司毛文炳蘭剛中畢拱辰太原知府孫康周署陽曲
縣事長史范志泰等官吏軍民咸在懋德哭衆皆哭罷
官命適至或請出城候代懋德不可曰吾已辦一死矣
景昌即至吾亦與俱死調陽和兵三千協守東門剛中
慮其內應移之南關之外遣步將張雄分守新南門召
中軍副總兵應時盛入叅謀議懋德等登城二月五日
賊至城下遣步將牛勇朱孔訓王永魁出戰死之明日

自成具鹵簿督衆攻城陽和兵叛降賊又明日晝晦懋
德草遺表須臾大風起拔木揚砂調張雄守大南門雄
已縋城出降語其黨曰城東南角樓火器火藥皆在我
下即焚樓夜中火起風轉烈守者皆散賊登城懋德北
面再拜出遺表付友人賈士璋問道達京師語人曰吾
學道有年已勘了死生今日吾致命時也即自劉麾下
持之時盛請下城巷戰顧懋德曰上馬懋德上馬時盛
持矛突殺賊數十人至炭市口賊騎充斥時盛呼曰出

西門懋德遽下馬曰我當死封疆諸君自去衆復擁懋德上馬至水西門懋德叱曰諸君欲陷我不忠耶復下馬據地坐時盛已出城殺妻子還顧不見復斫門入語懋德曰請與君俱死遂偕至三立祠懋德就縊未絕時盛釋甲加其肩乃絕時盛取弓弦自經建極危坐公堂賊擁之見自成不屈將斬之下堦呼萬歲者再曰臣失守封疆死有餘罪自成以為呼已也曳還建極瞑目曰我呼大明皇帝寧呼賊耶立射殺之時自成執晉王據

王宮云文炳被殺妻趙妾李亦投井死子兆夢甫數歲
賊掠去士民以其忠臣子也贖而歸之欲降剛中不從
殺之首既墮復躍起丈餘賊皆辟易賊適得新刀拱辰
睨之問何睨曰欲得此斫頭耳遂取斬之康周巷戰死
志泰不食死自懋德而下太原死事凡四十有六人賊
皆尸之城上自成恨懋德之不終也驗其尸以刀斷頸
而去福王時以懋德不守河為失策乃諡忠襄賜祭葬
而不予贈廕餘賜恤有差間考四十六人行事多缺姓

名不傳莫得而次云建極河南永寧人賊掠永寧時建極五子皆死後生三子又天至是趙氏一門竟絕文炳字夢石鄭州人以吏科給事中出為山西兵備副使為給事時楊嗣昌督師議調民兵討賊文炳言民兵可守不可調不若官軍乘馬便殺賊又言當大計主計者喜奔競抑廉靜宜令官得互糾不公者帝皆納其言剛中字坦生陵縣人為南京給事中奏保護留都六事又陳漕事救弊之要山東饑疏言民死而丁存田荒而賦在

安得不為盜宜清戶口并里甲皆切時病遷山西副使
拱辰字星伯掖縣人知朝邑鹽城二縣數遷數貶歷淮
徐兵備僉事督漕侍郎史可法謂其不任移之冀寧建
極文炳剛中拱辰由進士康周字晉侯安邱人由鄉舉
時盛遼陽諸生為懋德所知拔隸幕下至都督僉事志
泰虞城人餘莫考太原既破賊移檄遠近所至郡縣望
風結寨以拒官兵而其仗義死難陷胸斷脰而甘心者
則有若安邑知縣房之屏宛平人起家鄉舉城陷北向

拜天子入署拜其母命妻子各自盡遂投井賊曳出斬
之忻州知州楊家龍字惕若曲陽人為寧鄉知縣凡七
年流亡復其業遷忻賊即至曰此城必不守我出爾民
可全也出城罵賊而死州人祠祀之代州參將閻夢夔
鹿邑人汾州知州侯君昭皆城亡與亡汾陽知縣劉必
達袖出罵賊文賊誦而殺之其義勇范奇方刺殺一偽
都尉而自剄寧武兵備副使王孕懋字有懷由太原知
府遷自成既陷太原遣使說降孕懋斬之與總兵官周

遇吉共守城陷自殺妻楊投井殉之孕懋霸州人進士
遇吉自有傳寧武失賊破三關犯大同

衛景瑗字仲玉韓城人天啟五年進士授河南推官崇
禎四年徵授御史劾首輔周延儒納賄行私數事復劾
吏部侍郎曾楚卿儉邪帝不納出按真定諸府父喪不
俟命竟歸服闋起故官疏救給事中傅朝佑李汝璈以
論溫體仁下吏故帝不懌左遷行人司正歷尚寶大理
丞進少卿十五年春擢右僉都御史巡撫大同歲饑疫

疏乞賑濟蒐軍實煉火器戢豪宗聲績甚著十七年正月李自成將犯山西宣大總督王繼謨檄大同總兵官姜瓖扼之河上瓖潛使納款而還景瑗不知其變也及山西陷景瑗邀瓖插血守瓖出告人曰衛巡撫秦人也將應賊矣代王疑之不見景瑗永慶王射殺景瑗僕會景瑗有足疾不時出兵事瓖主之瓖兄瑄故昌平總兵也勸瓖降賊瓖慮其下不從人攜之銀言勵守城將士代王信之諸郡王分門守瓖每門遣卒二百人助守至

三月朔賊抵城下瑗即射殺永慶王開門迎賊入給景瑗計事景瑗乘馬出始知其變也自墜馬下賊執之見自成自成欲官之景瑗據地坐大呼皇帝而哭賊義之曰忠臣也不殺景瑗猝起以頭觸堦石血淋漓賊引出顧見瑗罵曰反賊與我盟而叛神其赦汝耶賊使景瑗母勸之降景瑗曰母年八十餘矣當自為計兒國大臣不可以不死母出景瑗謂人曰我不罵賊者以全母也初六日自縊於僧寺賊歎曰忠臣移其妻子空舍戒母

犯殺代王傳燁及其宗室殆盡分巡副使朱家仕盡驅妻妾子女入井而已從之死者十有六人督儲郎中徐有聲山陰知縣李倬亦死之諸生李若蔡自題其壁曰一門完節一家九人自經家仕河洲人福王時贈景瑗兵部尚書諡忠毅賊既陷大同以兵徇陽和長驅向宣府

朱之馮字樂三大興人天啓五年進士授戶部主事權稅河西務課贏貯公帑無所私以外艱去崇禎二年起

故官進員外郎坐星謫浙江布政司理問稍遷行人
司副歷刑部郎中浙江驛傳僉事青州叅議盜劫沂水
民株連甚衆之馮捕得真盜大獄盡解禽治樂安土豪
李中行權貴為請不聽進副使齎表入都寄家屬濟南
濟南破妻馮匿姑及子於他所而自沉於井姑李聞之
為絕粒而死柩還之馮廬墓側三年起河東副使河東
大猾朱全宇潛通秦賊之馮至則執殺之部內以寧之
馮自妻死不再娶亦不置妾媵一室蕭然十六年正月

擢右僉都御史巡撫宣府司餉主事張碩抱以剋餉激
變羣縛碩抱之馮出撫諭貸商民貲給散而密捕誅首
惡七人劾碩抱下吏軍情帖然明年三月李自成陷大
同之馮集將吏於城樓設高皇帝位歃血誓死守懸賞
格厲將士而人心已散監視中官杜勛且與總兵王承
允爭先納款矣見之馮叩頭請以城下賊之馮大罵曰
勛爾帝所倚信特遣爾以封疆屬爾爾至即通賊何面
目見帝勛不答笑而去俄賊且至勛蟒袍鳴騶郊迎三

十里之外將士皆散之馮登城太息見大礮語左右為
我發之默無應者自起藝火則礮孔丁塞或從後掣其
肘之馮撫膺歎曰不意人心至此仰天大哭賊至城下
承允開門入之訛言賊不殺人且免徭賦則舉城譁然
皆喜結綵焚香以迎左右欲擁之馮出走之馮叱之乃
南向叩頭草遺表勸帝收人心厲士節自縊而死賊棄
其屍濠中濠旁犬日食人屍獨之馮無損也同日死者
督糧通判朱敏泰諸生姚時中副將甯龍及繫獄總兵

董用文副將劉九卿及里居知縣申以孝其他婦女死義者又十餘人福王時贈之馮兵部尚書謚忠壯勛既降賊從攻京師射書於城中城中初聞勛死宣府帝為予贈廕立祠至是以為鬼守城監王承恩倚女牆而與語總勛入見帝盛稱自成上可自為計復總之出笑語諸守監曰吾輩富貴自在也

陳士奇字平人漳浦人也好學有文名不知兵舉天啟五年進士授中書舍人崇禎四年考選授禮部主事擢

廣西提學僉事父憂歸服闋起重慶兵備尋改貴州復督學政母憂闋起贛州兵備叅議進副使督四川學政廷臣交章薦士奇知兵十五年秋擢右僉都御史代廖大奇巡撫四川松潘兵變衆數萬士奇諭以禍福咸就撫姚黃賊十三家縱橫川東北十餘年殺掠軍民無算執少壯文其面為軍至數十萬士奇檄副使陳其赤葛徵奇叅將趙榮貴等進討屢告捷而賊狡迄不能制士奇本文人再督學政好與諸生談兵朝士以士奇知兵

及秉節鉞反以文墨為事軍政廢弛石砮女將秦良玉嘗圖全蜀形勢請益兵分守十三隘扼賊奔突置不問蜀以是擾明年十二月朝議以其不任命龍文光代之士奇方候代而陽平將趙光遠擁兵二萬護瑞王常浩自漢中來奔士民避難者又數萬至保寧蜀人震駭士奇馳責光遠曰若退守陽平關為吾捍衛不惜二萬金犒軍如煩此需厚餉吾頭可斷餉不可得也光遠退屯陽平王以三千騎奔重慶明年四月文光受代士奇將

行京師告變士奇自以知兵也曰必報國仇遂留駐重慶遣水師叅將曾英擊賊於忠州焚其舟遣趙榮貴禦賊於梁山獻忠由葫蘆壩左步右騎翼舟而上二將敗奔遂奪佛圖關陷涪州士奇徵石砭援兵不至或勸公已謝事宜去士奇不可賊抵城下擊以滾礮賊死無數二十日夜黑雲四布賊穴地轟城城陷王士奇及副使陳鱣知府王行儉知縣王錫俱被執士奇大罵賊縛於教塲將殺之忽雷雨晦瞑咫尺不見獻忠仰而詬曰我

殺人何與天事用大礮向天叢擊俄晴霽遂肆毒士奇
罵不絕口而死王亦遇害賊集軍民三萬七千餘人所
其臂遂犯成都繇本關南兵備副使護瑞王入蜀及於
難行儉字質行宜興人崇禎十年進士守重慶善撫馭
為賊鬻死錫新建人崇禎十三年進士除巴縣知縣嘗
從士奇殲土寇彭長庚之黨又斬搖黃賊魁馮超至是
賊蒙巨板穴城錫灌以熱油多死及被執大罵抉其齒
罵不已捶膝使跪益叱立昇至教場縛樹上射之又鬻

而烙之既死復燬其骨指揮顧景聞城陷入瑞王府以已所乘馬乘王鞭而走遇賊呼曰寧殺我毋殺帝子也賊刺殺王景遂死之

龍文光馬平人天啟二年進士崇禎十七年以川北叅政擢右僉都御史代陳士奇巡撫四川聞命與總兵官劉佳引率兵三千由順慶馳赴之部署未定數日而城陷賊盡驅文武將吏及軍民男婦於東門之外將僇之忽有龍尾下垂賊以為瑞遂停刑文光佳引卒不屈賊

殺文光於濯錦橋佳引自投於浣花溪

劉之勃字安侯鳳翔人崇禎七年進士授行人擢御史
上節財六義言先朝馬萬計草場止五六所今馬漸少
場反增二倍可節省者一水衡工役費歲幾百萬近奉
明旨朝廷不事興作而節慎庫額數襲為常可節省者
二諸鎮兵馬時敗潰而餉額不減虛伍必多可節省者
三光祿宴享賜賚大抵從簡而監局厨役多冗濫可節
省者四三吳織造澤潞機杼以及香蠟藥材陶器無歲


不貢積之內為廢物輸之下皆金錢可節省者五軍前
監紀監軍贊畫之官不可勝紀平時則以一人而糜千
百人之餉臨敵又以千百人而衛一人之身耗食兼耗
兵可節省者六又疏陳東廠三弊言東廠司緝訪而內
五城外巡按以及刑部大理皆不能舉其職此不便於
官守奸民千里首告假捏姓名一紙株連萬金立罄此
不便於民生子弟訐父兄奴僕訐家主部民訐官長東
廠皆樂聞此不便於國體帝皆納其言十五年出按四

川十六年秋類報災異請緩賦省刑亦弭災一術時不能
用明年正月張獻忠大破川中郡邑四月聞都城失
守人心益恟懼舉人楊鏘劉道貞等謀擁蜀王至澍監
國之勃不可躍入池中議乃寢八月賊逼成都之勃與
巡撫龍文光建昌兵備副使劉士斗等分陴拒守總兵
官劉鎮藩出戰而敗賊穴城實以火藥又剗大木長數
丈者合之纏以帛貯藥向城樓之勃厲衆奮擊賊却二
三里皆喜以為將去也初九日黎明火發北樓陷木石

飛蔽天守陴者皆散賊遂入城蜀王率妃妾自沉於荊井鎮藩突圍出赴浣花溪死之之勃等被執賊以之勃同鄉欲用之之勃勸以不殺百姓輔立蜀世子不從遂大罵賊攢箭射殺之時福王立於南京擢之勃右僉都御史巡撫四川已不及聞矣

贊曰潼關既破李自成乘勝竊據三秦渡河而東勢如燎原宣大既覆明亡遂決一時封疆諸臣後先爭死可不謂烈哉然平陽之柿甫東船窩之警旋告死非難所

以處死為難君子不能無憾於懋德焉若夫一鶴之死
顯陵士奇之死夔州劉之勃龍文光之死成都不亦得
死所者歟



明史卷二百六十三

欽定四庫全書

明史卷二百六十三考證

馮師孔傳賊果破秦悉為賊有焉

臣嚴福按綏寇紀

略賊逼西安川兵五千人助防兵無冬裝或勸秦王
人給一拂衣弗應謹附識

蔡德懋傳懋德攝兩司及三道印

臣嚴福按毛奇齡

所撰懋德傳懋德在山東有泰安知州餽以金帶懋
德提所束帶示之曰吾十餘年一銅帶耳且此何地

而得此州大慙解綬去謹附考

蔡懋德傳懋德連章告急

臣嚴福按毛奇齡所撰懋

德傳懋德疏曰賊聚而攻我散而守是以一往無堅
城也自今以往請分發禁旅并調真定大營諸兵合
之晉衆背關一戰尚可為疏入不報謹附考

衛景瑗傳徵授御史

臣嚴福按汪琬類稿景瑗任御

史時楊嗣昌議加餉景瑗抗疏力爭謂天下安危視
百姓利病邇者兵燹旁午旱蝗游臻奈何加征以促

之傳未載謹附識

衛景瑗傳自縊於僧寺

臣

嚴福按明紀事本末是時

大同總兵朱三樂亦自刎死三樂

賜謚並附載謹識

明史卷二百六十三考證

附明史卷二百六十三考證後

乾隆四十一年

賜謚諸臣

蔡懋德 專謚忠恪

蕭漢 林日瑞 郭天吉 馬爌 應時盛

陳士奇 王行儉 王錫 龍文光 劉之勅

以上通謚忠烈

馮師孔 衛景瑗 朱之馮

以上通謚忠節

宋一鶴 沈壽崇 哈維新 姚世儒 趙建樞

畢拱辰 孫康周 楊家龍 劉必達 王孚懋

徐有聲 顧景 劉佳引 劉士斗

以上通謚烈愍

黃 綱 章尚綱 吳從義 崔爾達 藍 臺

羅俊傑 趙 官 毛文炳 蔭剛中 范志泰

房之屏 閻夢夔 侯君昭 朱三樂 朱家社

李倬 朱敏泰 甯龍 董用文 劉九卿

申以孝 陳纁 劉鎮藩

以上通謚節愍

欽定四庫全書

史部

明史卷二百六十五

給事中臣劉湄覆勘

總校官編修臣朱鈐

欽定四庫全書

明史卷二百六十四

大學士張廷玉等奉敕修

列傳第一百五十二

賀逢聖

傳

在

其始翁

南居益

族父企仲

族

周士樸

呂維祺

弟維祐

王家禎

焦源溥

兄源清

李夢辰

宋師襄

麻僖

王道純

田時震

朱崇德

崇德子國棟

賀逢聖字克繇江夏人與熊廷弼少同里閭而不相能為諸生同受知于督學熊尚文尚文並奇二生曰熊生干將莫邪也賀生夏瑚商璉也舉于鄉家貧就應城教諭萬曆四十四年殿試第二人授翰林編修天啓間為洗馬當是時廷弼已再起經畧遼東廣寧之敗其同鄉官將揭白廷弼之寃意逢聖且沮之逢聖作色曰此乃

國家大事吾安敢小嫌介介不以明即具草上之湖廣
建魏忠賢生祠忠賢聞上梁文出逢聖手大喜即日詣
逢聖逢聖曰此借銜陋習耳忠賢拂然去翌日削逢聖
籍莊烈帝即位復官連進秩九年六月以禮部尚書兼
東閣大學士入閣輔政加太子太保改文淵閣十一年
致政十四年再入閣明年再致政逢聖為人廉靜束修
砥行帝頗事操切逢聖終無所匡言其再與周延儒同
召帝待之不如延儒及予告宴餞便殿賜金賜坐蟒感

激大哭伏地不能起帝亦泚瀾動容焉是時湖廣賊大
擾明年春張獻忠連陷蘄黃逼江夏有大冶人尹如翁
逢聖門生走三百里持一僧帽一絮婆來貽逢聖逢聖
反其衣曰子第去毋憂我如翁去五月壬戌晦賊陷武
昌執逢聖叱曰我朝廷大臣若曹敢無禮賊麾使去遂
投墩子湖死也賊來自夏去以秋云大吏望衍而祭有
神夢于湖之人我守賀相殊苦汝受而視之有黑子在
其左手其徵是覺而異之埃于湖赫然而尸出驗之果

是蓋沉之百有七十日面如生以冬十一月壬子殲大吏揮淚而葬之初城之陷也逢聖載家人以其舸艫出墩子鑿其舸艫皆溺賀氏死者妻危氏子覲明子婦曾氏陳氏孫三次子光明自他所來凡二十餘人福王時贈少傅謚文忠祭奠廕子如制如翁去歸大冶大冶城破其慷慨而死者如翁也其後有傳冠冠字元甫進賢人祖炯南京刑部尚書天啟二年冠舉進士第二授翰林編修崇禎十年秋由禮部右侍郎拜尚書兼東閣

大學士性簡易有章奏發自御前冠以為揭帖援筆判其上既知悞惶恐引罪帝即放歸唐王時命以原官督師江西嗜酒或劾之乃致仕

大清兵下江西冠走匿門人泰寧汪亨龍家亨龍執以獻有司殺之汀州血漬地久而猶鮮

南居益字思受渭南人尚書金仲族子師仲從子也曾祖從吉與曾伯祖大吉皆進士兩人子姓科第相繼企仲大吉孫萬厯八年進士以祖母年高請終養祖母既

歿授刑部主事客寓貧其家夫婦並歿企仲呼其子還之吏部尚書孫丕揚以為賢調為己屬厯文選郎擢太僕少卿進太僕卿三十年帝以疾詔免礦稅釋繫囚錄建言貶斥諸臣既而悔之命礦稅如故餘所司議行吏刑二部尚書李戴蕭大亨遲數日未奏企仲請亟罷二人而敕二部亟如詔奉行帝大恚傳諭亟停二事落企仲一官給事中蕭近高御史李培余懋衡亦請信明詔帝益怒並奪其俸且命益重前貶謫官鄒元標等罰欲

以鉗言者諸閣臣力爭乃止而給事中張鳳翔迎帝意
劾企仲他事遂削籍天啓初起太常卿累遷南京吏部
尚書以老致仕師仲父軒吏部郎中嘗著通鑑綱目前
編師仲至南京禮部尚書居益少厲操行舉萬曆二十
九年進士授刑部主事三遷廣平知府擢山西提學副
使鴈門叅政歷按察使左右布政使並在山西天啓二
年入為太僕卿明年擢右副都御史巡撫福建紅毛夷
者海外雜種紺眼赤鬚髮所謂和蘭國也自昔不通中

土由大泥咬啗吧二國通閩商萬厯中奸民潘秀引其
人據澎湖求市巡撫徐學聚令轉販之二國二國險遠
商舍而之呂宋夷人疑呂宋邀商舶攻之又寇廣東香
山澳皆敗不敢歸國復入澎湖求市且築城焉巡撫商
周祚拒之不能靖會居益代周祚賊方犯漳泉招日本
大泥咬啗吧及海寇李旦等為助居益使人招旦說攜
大泥咬啗吧賊帥高文律懼遣使求款斬之築城鎮海
港逼賊風櫃賊窮威泛舟去遂禽文律海患乃息五年

遷工部右侍郎總督河道魏忠賢銜居益叙功不及已
格其賞給事中黃承昊復論居益倚傍門戶躡躑通顯
遂削籍去閩人詣闕訟之不聽乃立祠以祀勒碑于彭
湖及平遠臺崇禎元年起戶部右侍郎總督倉場陝西
鎮缺餉至三十餘月居益請以陝賦當輸闕門者留三
十萬紓其急報可畿輔戒嚴居益在通州為城守計甚
備會工部尚書張鳳翔坐軍械不具下吏四司郎中瘐
死者三遂詔居益代鳳翔未幾試礮而炸兵部尚書梁

廷棟劾郎中王守履失職守履懼詆兵部郎中王建侯
誣已廷議不如守履言遂下獄居益疏抹帝以為徇私
削籍歸廷杖守履六十斤為民尋叙城守功復居益冠
帶十六年李自成陷渭南賁南氏餉百六十萬金仲年
八十三矣遇害誘降居益及金仲子禮部主事居業皆
不從明年正月賊遣兵擁之去加炮烙二人終不屈絕
食七日而死

周士樸字丹其商邱人萬歷四十一年進士除曲沃知

縣泰昌元年徵授禮科給事中中官王忝爵選淨身男
子索賄激變守陵劉尚忠鼓陵軍挾賞劉朝等假齋送
軍器名出行山海外勢洶洶織造李實訐周起元羣瑞
索冬衣辱尚書鍾羽正士樸皆疏爭士樸性剛果不能
委蛇隨俗尤好與中官相搢柱深為魏忠賢所惡會當
擢京御忠賢持不下士樸遂謝病歸崇禎元年起太常
少卿歷戶部左右侍郎拜工部尚書帝命中官張彝憲
監戶工二部出納士樸恥之數與齟齬彝憲訐於帝士

樸疏對辭直帝無以難未幾駙馬都尉齊贊元以遂平
長公主瑩價士樸不引瑞安大長公主例而壽寧大長
公主薨則引瑞安例上疏醜詆之遂削其籍十五年廷
臣交薦不名其年八月李自成陷商邱與妻曹妾張子
舉人業熙子婦沈同日縊死

呂維祺字介孺新安人祖母牛氏以守節被旌父孔學
事母孝捐粟千二百石振饑兩旌孝義維祺舉萬歷四
十一年進士授兗州推官擢吏部主事更歷四司光宗

崩皇長子未踐阼內侍導幸小南城維祺謁見慈慶宮
言梓宮在殯乘輿不得輕動乃止天啓初厯考功文選
員外郎進驗封郎中告歸開封建魏忠賢生祠遺書士
大夫戒勿預忠賢毀天下書院維祺立芝泉講會祀伊
洛七賢崇禎元年起尚寶卿遷太常少卿督四夷館明
年四月廷議軍餉維祺陳奉十五事其冬奏防微八事
言陛下初勤批荅今或留中留中多則疑慮起當防一
初虛懷商榷及擬旨一不當改擬徑行豈無當執奏當

防二初無疑厭疑厭諸臣自取今且共獲並進當防三
初日御講筵今始傳免當防四初寡嗜慾慎宴游今或
偶涉當防五初慎刑獄今有下詔獄者且登聞鼓擊恐
長囂訟風當防六初重廷推今間用陪非常典當防七
初樂謹言今或譴訶時及當防八帝優旨報之三年擢
南京戶部右侍郎總督糧儲設會計簿鈎考隱沒侵欺
及積逋不輸各數十百萬大者彈奏小者捕治立法嚴
督屯課倉庾漸充條上六議曰稽出入以杜侵漁增比

較以完積案設本科以重題覆時會計以覆支收定差序以杜營私禁差假以修職業帝稱善即行之六年拜南京兵部尚書叅贊機務清冒伍八千餘名請申飭江防鳳陵單外為憂弗省八年正月賊犯江北遣叅將薛邦臣防全椒趙世臣戍浦口世臣潰走南京震動鳳陽亦旋告陷大計拾遺言官復劾他事遂除名時維祺父孔學避賊洛陽維祺乃歸留洛立伊洛會及門二百餘人著孝經本義成上之十二年洛陽大饑維祺勸福王

常洵散財餉士以振人心王不省乃盡出私廩設局振濟事聞復官然飢民多從賊者河南賊復大熾無何李自成大舉來攻維祺分守洛陽北城夜半總兵王紹禹之軍有騎而馳者周呼于城上城外亦呼而應之于是城陷賊有識維祺者曰子非振饑呂尚書乎我能活爾爾可以間去維祺弗應賊擁維祺去時福王常洵匿民舍中賊跡而執之遇維祺于道維祺反接望見王呼曰王網常至重等死耳毋屈膝于賊王瞠不語見賊渠于

周公廟按其項使跪不屈延頸就刃而死時十四年之
正月某日也維祺年五十有五贈太子少保祭葬廕子
如制而維祺之家在新安者十六年城陷家亦破弟維
祐字泰孺由選貢生為樂平知縣者也至是解職歸亦
抗節死贈按察僉事福王立南京加贈維祺太傅謚忠
節

王家禎長垣人萬歷三十五年進士天啓間歷官左僉
都御史巡撫甘肅松山部長伊勒敦達春擾西鄙二十餘

年家禎至三犯三却之先後斬首五百四十擢戶部右侍郎轉左崇禎元年攝部事邊餉不以時發秋遼東兵鼓譟巡撫畢自肅自經死帝大怒削家禎籍己叙甘肅功復其冠帶九年七月京師被兵起兵部左侍郎尋以本官兼右僉都御史總理河南湖廣山西陝西四川江北軍務代盧象昇討賊會河南巡撫陳必謙罷即命兼之督將士會勦賊馬進忠等于南陽復遣兵救襄陽大戰牌樓閣其冬家丁鼓譟燒開封西門家禎夜自外歸

慰諭犒賞詰且發往南陽討土寇楊四以去楊四者舞陽劇道也初四與其黨郭三海侯馭民等降于必謙至是復叛故家禎有是遣其後南陽同知萬年策與監紀推官湯開遠諸將左良玉牟文綬等連破四四焚死其黨亦為諸將所禽誅云當是時流賊盡趨江北留都震驚言者謂家禎奉命討安慶賊未嘗一出中州帝亦以家丁之變心輕之明年四月乃以總理授熊文燦令家禎專撫河南文燦未至詔遣左良玉援安慶家禎不遣

秋劉國能犯開封裨將李春貴等戰歿議罪家禎落職
閒住久之李自成陷京師遣兵據長垣設偽官家禎與
其子元炘並自縊死

焦源溥字涵一三原人萬曆四十一年進士歷知沙河
濬二縣考最召為御史熹宗嗣位移宮議起刑部尚書
黃克纘請寬盜寶諸奄源溥折之曰光宗神宗元子也
為元子者為忠則為福藩者非忠孝端孝靖神宗后也
為二后者為忠則為鄭貴妃者非忠孝元孝和光宗后

也為二后者為忠則為李選侍者非忠貴妃三十年心事人誰不知張差持梃危在呼吸尚忍言哉況當先帝御極之初忽傳皇祖封后之命請封不得治容進矣張差之梃不中則授以女優之惑崔文昇之藥不速則促以李可灼之丸痛哉先帝欲諱言進御之事遂甘蒙不白之冤今即厚待貴妃始終恩禮而鄭養性之都督不可不奪也崔文昇不可不磔也若竟置不問不幾於忘父乎李選侍一宮人更非貴妃比如聖諭阻陛下於煖

閣挾陛下以垂簾及凌虐聖母狀有臣子所不忍言者
今即為選侍乞憐第可求曲宥前辜量從優典而移宮
始末不可得而抹殺也盜寶諸奄不可得而寬宥也若
竟置諸奄弗問不幾於忘母乎疏上舉朝寒懼天啓二
年憂歸服闋還朝出按真定諸府例轉鳳陽兵備副使
時崔文昇出鎮兩淮欲甘心源溥遂移疾歸崇禎二年
起故官分巡河東道遷寧武參政有平寇功就遷山西
按察使七年擢右僉都御史巡撫大同時邊事日棘兵

缺伍餉又久之歲浹饑民淘馬糞以食源溥請蠲振增餉當事不能應踰年自劾求去遂罷歸十六年冬李自成陷關中與從兄源清同被執勒令輸金源溥瞋目大罵賊拔其舌支解之源清字湛一由進士歷官宣府巡撫七年秋坐萬全左衛失守奪官謫戍久之釋還年七十至是抗節不食七日死

李夢辰字元居睢州人崇禎元年進士授庶吉士改兵科給事中時盜起陝西山東曹濮間之盜道梗三百餘

里河北有猢賊夢辰厯陳其形請勅將吏急防五年上
疏言中外交訐秦晉齊魯多亂兩河居中尤要地鉛硝
久市直未償漕米歲輸累無已宗祿併徵南陽加派河
決歲歉郵傳催科之患百出民室如懸磬生計日不支
急難誰肯用命兩河標兵磁兵新舊不滿七千一有警
防禦何資今日之務急防河繕城備器練鄉兵治甲冑
尤以收拾人心為本帝命所司嚴飭六年冬鉅盜盡萃
河北夢辰慮其南犯請勅河南諸道監司急防渡口而

巡撫移駐衛輝與山西保定二撫臣犄角急擊帝方下
兵部議賊已從澠池潛渡自是中州郡縣無日不告警
矣累遷本科左給事中復言將驕軍悍鄧玘張外嘉之
兵弑主而叛曹文詔艾萬年之兵望賊而奔兀世威徐
來朝之兵離汎而遁今者張全昌趙光遠之兵且倒戈
為亂矣榮澤劫庫殺人偃師列營對壘且全昌等會勦
豫賊隨處逗遛及中途兵變全昌竟東行光遠始西向
驕抗如此安可不重治帝頗採其言進吏科都給事中

都御史唐世濟薦霍維華福建巡按應喜臣薦周維京
冀並翻逆案夢辰疏駁之世濟喜臣皆下吏謫戍尋擢
太常少卿累遷至通政使坐代人削章奏貶秩調任未
幾有持金囑中書舍人某賄大學士求為副都御史者
邏卒廉得之詞連夢辰帝令夢辰自奏事得白然夢辰
竟坐是削籍十五年春賊攻開封不克遂去陷西華屠
陳州逼睢州時州缺正官夢辰歸即棄城主守無何賊
從他門入擁夢辰見羅汝才汝才問所欲曰我大臣但

欲死爾汝才去遣其客說降且進之酒夢辰覆杯於地
太息起扼吭而卒妻王氏方病聞之不食死

宋師襄耀州人萬歷四十四年進士歷官御史天啓三
年五月請罷內操言自劉朝營脫死與沈淮謀為固寵
計淮以募兵為朝外護朝以內操為淮內援官府內外
知有朝而不知天子天牖聖聰一旦發露屏之南京然
朝雖去而三千虎旅安歸世未有蓄怨藏怒之人潛布
左右而不為患者今惟有散之而已夫平日卯翼朝者

黃克纘也亡何以戎政內宣抄叅朝者毛士龍也未幾以構陷削籍豈非握兵據要轉相恐喝以至是乎帝以內操祖宗故事不納又陳足財之策請減上供汰冗官覈營造省賚賞皆宦官所不便格不行奉聖夫人客民子及中官王體乾宋晉魏進忠等十二人俱世襲錦衣進忠者魏忠賢也師襄力諫又言左都御史熊尚文工部侍郎周應秋登萊巡撫袁可立當去不去光祿卿須之彥太常卿呂純如不當來而來帝皆不聽四年巡按

河南陸辭言今之言者皆曰治平要務乃終日籌邊事
商國計飭吏治計民生弭盜賊而漫無實效所以然者
臺諫以進言為責條奏一入即云盡職言之行否置弗
問矣六曹以題覆為責題覆一上即云畢事事之行否
置弗問矣內閣以票擬為責票擬一定即為明綸旨之
行否置弗問矣上謾下欺釀成大患今人怨已極天怒
已甚災害並至民不聊生相聚思亂十而八九臣恐今
日之患不在遼左黔蜀而在數百年休養之赤子也明

年復命薦部內人才首及尚書盛以弘魏忠賢責以徇私貶一秩調任師襄遂歸崇禎元年召復官擢太僕少卿累遷至太常卿致仕奸人宋夢郊假師襄手書營兵部事覺師襄被逮繫獄者二年至徐石麒為刑部始得雪十六年冬賊陷耀州師襄死之

麻僖慶陽人父永吉由庶吉士為御史終湖廣按察使以清操聞僖舉萬厯三十五年進士授吉士改為兵科給事中代王長子鼎渭訐父廢長立幼僖劾代王無君

鼎渭無父四十年疏陳納諫諍舉枚卜補大僚登遺佚
速考選數事不報已復請重武科復比試清納級汰家
丁恤班操急邊餉時亦不能用遼東巡撫揚鎬請用舊
將李如梅以僖言改用張承蔭承蔭未至而鎮遠堡曹
莊相繼失事鎬皆不以實聞僖兩疏劾之鎬旋引去已
與同官孫振基等劾熊廷弼殺人媚人又言湯賓尹取
韓敬闕節顯然語具振基傳尋乞假歸四十五年京察
賓尹黨用事以僖倚附東林謫山西按察知事天啓二

年起兵部主事歷尚寶丞少卿改太常五年六月魏忠賢黨御史陳世倌劾之遂落職崇禎初復官致仕家居十六年冬李自成陷慶陽僖死之

王道純字懷鞠蒲城人天啓五年進士授中書舍人崇禎三年擢御史疏陳破資格之說言銓除舉劾考選甲乙科太低昂宜變通則賢才日廣帝命所司即行而甲科勢重卒不能返流賊踰關中道純請急振饑民毋使從賊報可己劾罷光祿卿蘇晉叅政張爾基四年劾吏

部尚書王永光當去者三不可留者四不納巡按山東其時李九成孔有德叛於吳橋南下道純遺書巡撫余大成令討捕大成不信再促之遂托疾請告與登萊巡撫孫元化遣使招撫道純以為非請勅二撫速勦及賊陷登州元化被繫大成猶主招撫道純憤抗疏力爭帝即命道純監軍及徐從治代大成謝璉代元化並入萊州為賊困在外調度止道純一人賊遣人偽乞撫道純焚書斬使馳疏言賊日以撫愚我一撫而六城陷再撫

而登州亡三撫而黃縣失今四撫而萊州被圍我軍屢
挫安能復戰乞速發大軍拯此危土時周延儒熊明遇
主撫議道純反被責讓明遇遣職方主事張國臣贊畫
軍事國臣入賊中招諭賊佯許之攻圍如故及總督劉
宇烈至進兵沙河道純與之俱宇烈中情怯頓兵不進
日議撫尋棄軍奔道純復請速討不納迨巡撫謝璉被
執帝震怒逮宇烈召道純還京而明遇亦罷去宇烈下
吏引道純分過道純疏駁其所奏十餘事命所司并按

又劾明遇國臣交通悞國十罪語侵延儒疏未下延儒
洩之國臣國臣亦劾道純十罪道純遂并劾延儒帝皆
不問已而賊平道純竟坐監軍溺職斥為民十五年以
廷臣薦將起用未果及李自成陷蒲城道純抗節死福
王時贈卹如制

田時震富平人天啓二年進士歷知光山靈寶崇禎二
年入為御史疏劾南京戶部尚書范濟世順天巡撫單
明詡御史卓邁黨逆罪而請免故御史夏之令誣坐賊

並從之劾劉鴻訓納田仰金囑吏部尚書王永光用為
四川巡撫仰迄罷去時震以發鴻訓私進秩以等未幾
又劾永光及溫體仁忤旨切責御史索弘勛者永光心
腹也被劾罷職永光力援之時震言弘勛因閣臣劉鴻
訓賄敗輒肆瀆辨不知鴻訓之差快人意者正以能別
白徐大化霍維華諸人之奸而斥去之安得借此為翻
案之端耶弘勛計行大化維華輩將乘間抵隙害不可
勝言因薦故光祿少卿史記事蕭然四壁講學著書亟

宜召用帝不納時震既屢忤永光遂以年例出為江西
右叅議調山西就遷左叅政罷歸十六年冬流賊陷富
平授以偽職不屈死同邑朱崇德字淳菴侍郎國棟父
也國棟中天啓二年進士歷戶科給事中吏部侍郎張
捷薦逆案呂純孺國棟上疏力詆已又劾兩廣總督熊
文燦招撫海盜劉香奏詞掩飾欺罔五罪帝切責文燦
而國棟累遷巡撫山東右僉都御史督治昌平十五年
卒國棟卒之明年富平陷於賊賊驅崇德往長安中道

稱病賊見其老以為果病也聽之歸崇德曰始吾所以
隱忍者為九族計今得死所矣乃北面再拜自縊死
是時關中諸死節者甫議卹而國變至福王立始贈崇
德右副都御史

贊曰流賊荼毒中原所至糜爛士大夫遘難者不死則
辱然當其時徘徊隱忍蒙垢而終以自戕者亦不少矣
賀逢聖諸人從容就義臨患難而不易其節一死顧不
重哉逢聖與南居益周士樸公方清正呂維祺遂學純

末季之習痛哉其言之也

明史卷二百六十四

欽定四庫全書

明史卷二百六十四考證

賀逢聖傳同鄉官將揭白廷弼之寃

臣嚴福按同鄉

官謂梅之煥滿朝薦等見通鑑紀事謹附考

賀逢聖傳十一年致政十四年再入閣明年再致政

臣嚴福按逢聖之初致政也以申救詹事黃道周

與首輔張至發議多忤其再致政也以與蔡國用不

合見崇禎長編謹附考

王家禎傳言者謂家禎奉命討安慶賊未嘗一出中州

臣嚴福又按明實錄言者謂給事中羅志儒謹附考

李夢辰傳有持金囑中書舍人某賄大學士求為副都

御史者

臣

嚴福按明紀事本末中書舍人係王彥

陞大學士係薛國觀謹附考

明史卷二百六十四考證

附明史卷二百六十四考證後

乾隆四十一年

賜謚諸臣

賀逢聖 專謚忠愍

呂維祺 專謚忠敬

傅 冠 南居益 焦源溥

以上通謚忠烈

南企仲 周士樸 王家禎 焦源清 李夢辰

宋師襄 麻僖 王道純 田時震

以上通謚忠節

南居業 通謚烈愍

呂維祐 朱崇德

以上通謚節愍